

საჯარო სამართლის იურიდიული პირი -
ბათუმის შოთა რუსთაველის სახელმწიფო უნივერსიტეტი

ბრძანება N01-08/114


ქ. ბათუმი

7 სექტემბერი, 2018 წ.

2018-2019 სასწავლო წლიდან ზოგადი განათლების დაწყებითი საფეხურის მასწავლებლის მომზადების ინტეგრირებულ საბაკალავრო-სამაგისტრო საგანმანათლებლო პროგრამაზე ბსუ-ში ჩარიცხვის უფლებამოსილებულ პირებთან გასაფორმებელი ხელშეკრულების ფორმის დამტკიცების შესახებ

„უმაღლესი განათლების შესახებ“ საქართველოს კანონის 22-ე მუხლის პირველი პუნქტის, 43-ე, 46-ე და 48-ე მუხლების, ბსუ-ს წესდების მე-13, 66-70-ე მუხლების, „ბსუ-ს სასწავლო პროცესის მარეგულირებელი წესის დამტკიცების შესახებ“ ბსუ-ს აკადემიური საბჭოს 2015 წლის 8 ოქტომბრის №111 დადგენილების, „საჯარო სამართლის იურიდიული პირის - ბათუმის შოთა რუსთაველის სახელმწიფო უნივერსიტეტის სტუდენტთა სწავლის საფასურის გადახდის წესის დამტკიცების შესახებ ბსუ-ს წარმომადგენლობითი საბჭოს 2015 წლის 29 სექტემბრის N6 გადაწყვეტილების საფუძველზე

ვ ბ რ ძ ა ნ ე ბ :

1. დამტკიცდეს 2018-2019 სასწავლო წლიდან ზოგადი განათლების დაწყებითი საფეხურის მასწავლებლის მომზადების ინტეგრირებულ საბაკალავრო-სამაგისტრო საგანმანათლებლო პროგრამაზე ბსუ-ში ჩარიცხვის უფლებამოსილებულ პირებთან გასაფორმებელი ხელშეკრულების თანდართული ფორმა (დანართი 1).
2. ბრძანების აღსრულება დაევალოს:
 - ა) სტუდენტთა კარიერული განვითარების, კულტურისა და სპორტის დეპარტამენტს - 2018 წლის 10 სექტემბრიდან 2018 წლის 1 ოქტომბრამდე პერიოდში, „2018 წლის ერთიანი ეროვნული გამოცდების შედეგად აბიტურიენტების ბსუ-ში ჩარიცხვისათვის გასატარებელი ღონისძიებების შესახებ“ ბსუ-ს რექტორის 2018 წლის 21 აგვისტოს N01-08/103 ბრძანების ფარგლებში;
 - ბ) ბსუ-ს ფაკულტეტების დეკანების ოფისებს - 2018 წლის 1 ოქტომბრიდან.
3. ხელშეკრულება ბსუ-ს მხრიდან დამოწმდეს (გამოყენებული იქნეს) რექტორის ფაქსიმილით.
4. ბსუ-ს სტამბამ უზრუნველყოს სტუდენტთან გასაფორმებელი ხელშეკრულების ფორმების 2018 წლის 10 სექტემბრამდე დაბეჭდვა, სტუდენტთა კარიერული განვითარების, კულტურისა და სპორტის დეპარტამენტის სამსახურებრივი ბარათის საფუძველზე.
5. ბრძანება სახელმძღვანელოდ და აღსასრულებლად დაეგზავნოს ბსუ-ს ადმინისტრაციის ხელმძღვანელს, რექტორის მოადგილეებს, ფაკულტეტებს, სტუდენტთა კარიერული განვითარების, კულტურისა და სპორტის დეპარტამენტს, ხარისხის უზრუნველყოფის სამსახურს, სასწავლო პროცესის დეპარტამენტს და ბსუ-ს სტამბას.
6. ბრძანება ძალაშია ხელმოწერისთანავე.
რექტორი, ასოცირებული პროფესორი  მერაბ ხალვაში

ხელშეკრულება №

ქ. ბათუმი

” _____ ” 201_ წ.

ერთის მხრივ საჯარო სამართლის იურიდიული პირი – ბათუმის შოთა რუსთაველის სახელმწიფო უნივერსიტეტი (შემდგომში „უნივერსიტეტი“ ან „ბსუ“), წარმოდგენილი უნივერსიტეტის რექტორის, ასოცირებული პროფესორის მერაბ ხალვაშის და მეორე მხრივ ფიზიკური პირი _____ (შემდგომში „სტუდენტი“) ვდებთ წინამდებარე ხელშეკრულებას შემდეგზე:

მუხლი 1. ხელშეკრულების საგანი

ხელშეკრულების საგანია უნივერსიტეტსა და ბსუ-ს ზუსტ მეცნიერებათა და განათლების ფაკულტეტის ზოგადი განათლების დაწყებითი საფეხურის მასწავლებლის მომზადების ინტეგრირებული საბაკალავრო-სამაგისტრო საგანმანათლებლო პროგრამის (შემდგომში „პროგრამა“) სტუდენტს შორის ურთიერთობის რეგულაცია.

მუხლი 2. მხარეთა უფლებები და მოვალეობები

2.1. მხარეთა უფლება-მოვალეობები განისაზღვრება წინამდებარე ხელშეკრულებით, საქართველოს კანონმდებლობით, უნივერსიტეტის წესდებით, შინაგანაწესით, ეთიკის კოდექსით, უნივერსიტეტის სასწავლო პროცესის მარეგულირებელი სამართლებრივი აქტებით, სწავლის საფასურის გადახდის წესითა და სხვა აქტებით.

2.2. სტუდენტი ადასტურებს, რომ გაცნობილია უნივერსიტეტის ვებგვერდზე განთავსებულ „სტუდენტის გზამკვლევს“, მასში მითითებულ სამართლებრივ აქტებს და კისრულობს ვალდებულებას:

ა) შეასრულოს შესაბამისი საგანმანათლებლო პროგრამის მოთხოვნები და ამ მიზნით, ბსუ-ს სამართლებრივი აქტებით დადგენილ ვადაში გაიაროს აკადემიური რეგისტრაცია (დაარეგისტრირდეს სავალდებულო და არჩევითი სასწავლო კურსები) და შეასრულოს სასწავლო კურსების სილაბუსებით გათვალისწინებული სამუშაო;

ბ) ბსუ-ს სამართლებრივი აქტებით დადგენილ ვადაში გადაიხადოს უნივერსიტეტში სწავლის საფასური (გაიაროს ადმინისტრაციული რეგისტრაცია);

გ) სისტემატიურად ისარგებლოს „სასწავლო პროცესის მართვის ელექტრონულ სისტემით“/„სტუდენტური პორტალით“, რომლის საშუალებით მას მიეწოდება უნივერსიტეტის შეტყობინებები ან/და ინფორმაცია სასწავლო პროცესისა და შესაბამისი სამართლებრივი აქტების გამოცემის თაობაზე;

დ) უნივერსიტეტთან კომუნიკაციისათვის (ინფორმაციის, ცნობების მიღება) ისარგებლოს სტუდენტური პორტალით და პირადი მონაცემების ცვლილების შემთხვევაში წარმოადგინოს ინფორმაცია სტუდენტურ პორტალზე/ელექტრონულ სისტემაში, მის პირად პროფილში ასახვის მიზნით;

ე) გაეცნოს უნივერსიტეტის სამართლებრივ აქტებს (ასახება „სტუდენტის გზამკვლევში“/ განთავსდება უნივერსიტეტის შესაბამისი ფაკულტეტის საინფორმაციო დაფაზე/სასწავლო პროცესის მართვის ელექტრონულ სისტემაში/სტუდენტურ პორტალზე/ კანცელარიასთან არსებულ საინფორმაციო დაფაზე/ უნივერსიტეტის ვებ-გვერდზე (www.bsu.edu.ge)) ან/და უნივერსიტეტის გაზეთში „ბათუმის უნივერსიტეტი“);

ვ) სარგებლობისას გაუფრთხილდეს უნივერსიტეტის ქონებას, შეინარჩუნოს მისი ხარისხობრივი და რაოდენობრივი მდგომარეობა; ჯეროვნად შეასრულოს ამ

ხელშეკრულებით, უნივერსიტეტის აქტებითა და მოქმედი კანონმდებლობით განსაზღვრული სხვა ვალდებულებები;

2.3. სტუდენტი უფლებამოსილია:

ა) უნივერსიტეტისაგან მიიღოს საგანმანათლებლო პროგრამის შესაბამისი და ხარისხიანი საგანმანათლებლო მომსახურება, ასევე მონაწილეობა მიიღოს სამეცნიერო-კვლევით საქმიანობაში;

ბ) უნივერსიტეტის სამართლებრივი აქტებით დადგენილი წესით ისარგებლოს უნივერსიტეტის მატერიალურ-ტექნიკური ბაზით, ბიბლიოთეკით, საინფორმაციო და სხვა საშუალებებით;

გ) საქართველოს მოქმედი კანონმდებლობითა და ბსუ-ს სამართლებრივი აქტების შესაბამისად შეიწყვიტოს ან შეიჩეროს სტუდენტის სტატუსი, ისარგებლოს მობილობის უფლებით;

დ) საყოველთაო, პირდაპირი და თანასწორი არჩევნების საფუძველზე, ფარული კენჭისყრით, აირჩიოს ან/და არჩეულ იქნეს სტუდენტურ თვითმმართველობაში და უნივერსიტეტისა და ფაკულტეტის მართვის ორგანოში.

2.4. სტუდენტი თანახმაა მისი პერსონალური მონაცემები დამუშავებული იქნეს ბსუ-ს მიერ, წინამდებარე ხელშეკრულების მიზნებიდან და სხვა კანონიერი საჭიროებიდან გამომდინარე (სტუდენტურ პორტალზე/სასწავლო პროცესის მართვის ელექტრონულ სისტემაში განთავსება და სხვა).

2.5. უნივერსიტეტი ვალდებულია უზრუნველყოს სტუდენტი:

ა) ხარისხიანი განათლებით;

ბ) სამეცნიერო კვლევაში მონაწილეობით;

გ) სწავლისათვის აუცილებელი მატერიალურ-ტექნიკური ბაზით, ბიბლიოთეკით, საინფორმაციო და სხვა საშუალებებით;

დ) შესაბამისი ფაკულტეტისა და უნივერსიტეტის მართვის ორგანოების არჩევნებში მონაწილეობის უფლებით;

ე) უნივერსიტეტის პერსონალის შეფასებაში მონაწილეობის უფლებით;

ვ) საქართველოს კანონმდებლობით, „უმაღლესი განათლების შესახებ“ საქართველოს კანონით, უნივერსიტეტის წესდებითა და სხვა აქტებით მინიჭებული უფლებებით.

მუხლი 3. სწავლის საფასური

3.1. პროგრამაზე სწავლის საფასური (ერთი სასწავლო წლისათვის) შეადგენს _____ ლარს. სტუდენტის პროგრამაზე სწავლა (ხუთი სასწავლო წელი) სრულად ფინანსდება სახელმწიფოს მიერ.

3.2. სტუდენტი, პროგრამით გათვალისწინებული კრედიტების განმეორებით დარეგისტრირების (დავალიანების ან შეფასების გაუმჯობესების მიზნით) შემთხვევაში, სწავლის საფასურს იხდის სემესტრულად, უნივერსიტეტის წარმომადგენლობითი საბჭოს გადაწყვეტილებით დამტკიცებული „სწავლის საფასურის გადახდის წესის“ შესაბამისად (სწავლის საფასური გადახდილი უნდა იქნეს შემდეგ რეკვიზიტებზე: მიმღების ბანკი - სახელმწიფო ხაზინა; მიმღების დასახელება - ხაზინის ერთიანი ანგარიში; ბანკის კოდი - TRESGE22; მიმღების ანგარიში/სახაზინო კოდი - 7 0901 7289 - უმაღლეს საგანმანათლებლო დაწესებულებებში სწავლის საფასური; დანიშნულებაში უნდა მითითოს: სტუდენტის სახელი, გვარი, პირადი ნომერი, ფაკულტეტი, სპეციალობა, კურსი);

3.3. სემესტრის დაწყებისა და დასრულების (აკადემიური კალენდარი), ასევე აკადემიური და ადმინისტრაციული რეგისტრაციის პერიოდი, განისაზღვრება უნივერსიტეტის სამართლებრივი აქტებით, რომელიც ქვეყნდება უნივერსიტეტის ოფიციალურ ვებგვერდზე (ველში „სწავლა“).

მუხლი 4. ხელშეკრულების მოქმედების ვადა და სტუდენტის სტატუსი

4.1. წინამდებარე ხელშეკრულება ძალაშია ----- და მოქმედებს მის შეწყვეტამდე;

4.2. ხელშეკრულების შეწყვეტის საფუძველია ბსუ-ს სტუდენტის სტატუსის შეწყვეტა;

4.3. უნივერსიტეტის სტუდენტის სტატუსის შეწყვეტის სხვა საფუძველებია:

ა) პირადი განცხადება;

ბ) სხვა უმაღლეს საგანმანათლებლო დაწესებულებაში გადასვლა;

გ) შესაბამისი საგანმანათლებლო პროგრამის ვადის ამოწურვა, გარდა უნივერსიტეტის რექტორის/აკადემიური საბჭოს დადგენილებით განსაზღვრული გამონაკლისი შემთხვევებისა;

დ) საქართველოს კანონმდებლობით, უნივერსიტეტის წესდებით, შინაგანაწესითა და ეთიკის კოდექსით განსაზღვრული სხვა შემთხვევები;

4.4. სტუდენტის სტატუსის შეჩერების საფუძველებია:

ა) პირადი განცხადება;

ბ) ავადმყოფობა;

გ) უცხო ქვეყანაში სასწავლებლად წასვლა, გარდა გაცვლითი საგანმანათლებლო პროგრამის ფარგლებში სწავლისა;

დ) ადმინისტრაციული ან/და აკადემიური რეგისტრაციის გაუვლელიობა;

ე) ალკვითის ღონისძიების სახით პატიმრობის შეფარდება;

ვ) საქართველოს კანონმდებლობით, უნივერსიტეტის წესდებითა და სხვა აქტებით განსაზღვრული შემთხვევები.

მუხლი 5. სხვა პირობები და მხარეთა რეკვიზიტები

5.1. უნივერსიტეტის სტუდენტის სტატუსშეჩერებული/სტატუსშეწყვეტილი პირის აღდგენის, სტუდენტის მიერ საგანმანათლებლო პროგრამის შეცვლის შემთხვევაში, მოქმედებს უნივერსიტეტის უახლესი აქტებით დადგენილი მოთხოვნები.

5.2. წინამდებარე ხელშეკრულებით გაუთვალისწინებელ შემთხვევებში მხარეები ხელმძღვანელობენ მოქმედი კანონმდებლობით;

5.3. ამ ხელშეკრულებიდან გამომდინარე დავის არსებობის შემთხვევაში, მხარეთა შორის შეთანხმების მიუღწევლობის შემთხვევაში, სასამართლოში მიმართვის ვადა აითვლება უნივერსიტეტის სტუდენტის სტატუსის შეწყვეტის შესახებ აქტის გამოცემის თარიღიდან.

5.4. ხელშეკრულება შედგენილია ორ ეგზემპლარად, ორივეს გააჩნია თანაბარი იურიდიული ძალა და ინახება მხარეებთან.

5.5. მხარეთა რეკვიზიტები:

„უნივერსიტეტი“

საჯარო სამართლის იურიდიული პირი

- ბათუმის შოთა რუსთაველის

სახელმწიფო უნივერსიტეტი

ქ. ბათუმი, ნინოშვილის/რუსთაველის ქ.

№35/32

„სტუდენტი“

სახელი, გვარი _____

პირადი № _____

ფაქტობრ. მისამთ. _____

რეგისტრ. მისამ. _____

ტელეფონი _____

ელ. ფოსტა _____

სტუდენტის ხელმოწერა _____

(რექტორის ხელმოწერა)